

三十六、賴氏

蕉嶺賴氏族譜

蕉嶺賴氏族譜卷首鈔本一冊，蕉嶺賴特才先生囑其族人某君所鈔寄。余於民國二十二年，任職於廣州國立中山大學文史研究所及廣東通志館，首著客家研究導論。越年秋，移席南京國立中央大學。後數月，以商討嘉屬同鄉公益事宜，於曾養甫先生家，始識賴特才先生。見其沉着而富才思，且熱心於客家史料之蒐集，余因索借其族譜乘。後月餘，賴君至中央大學教習房訪余，果出其族譜卷首鈔本一冊，且謂適自蕉嶺所寄至者。余細加研考，見其所載各序文，及老譜遷徙考，與先世源流等，皆於蕉嶺賴氏之源流與遷移事蹟等，有相當記述，爰爲摘錄數事，實於客家史料匯篇，倘亦賴君所樂許也。民國二十四年五月一日，編者識於南京大石橋民新坊。

賴氏自春秋以來，歷世二千餘年，郡凡二，遷徙凡三，而其源則本於賴國。……文獻通考：賴國在褒信縣。元省縣爲鎮，今在息縣東北，其賴亭則在商城縣南。息縣商城皆屬河南汝寧府光州。……是穎川郡爲賴國子姓散處之區明矣。其由穎川繼遷松陽，自莊公始。西晉永興間，列室官浙東，從東海王越，討成都王穎，卒於軍，反葬浙東，一子元。元二子：長厚、次莊，遷松陽，家焉。莊之子遇，遂以松陽爲郡。遇公任江東太守，一子匡。……匡公子二：長碩、字仲方，劉宋元嘉末，偕弟

毅，由松陽遷南康郡之揭陽。（按此揭陽即今江西寧都）。……當仲方遷揭陽時，徐道覆自始興北陷南康，陳霸先自始興進軍南康，……故吾賴氏遂斂跡於宜黃界之桴源。密菁深林，冥鴻蹈晦，蓋自松陽遷徙後，直以桴源爲樂土矣。後稍居赤竹坪，隋開皇十八年，以赤竹坪改虔化縣，即今寧都官廨。……（老譜遷徙考）。

碩公生三子：長徽，字文獻，生子辰，早夭；次郁，字文華，生子定，陳大建間，任潭州轉運使，遂家潭州；次燦，字文輝，子七：長昭，次得，次虔，次明，次思，次求，次彥。隋開皇十八年，有司奏遷湯田，營縣治於赤竹坪，更名虔化，子孫遂多散處。……

得公仕唐，武德初，官至太尉。生子三：長標，次桂，次樞，皆徙汀州。其後又分徙清流、上杭、永定、寧化、永春、漳州，廣東程鄉、鎮平、平遠，復轉徙贛州、定南、瑞金、興國。虔公一子，奉歸桴源熱水，其後分出永豐、萬安、豐城、撫州、龍南、安遠。明公子二：長杞，次松，徙水西，又徙宜黃、樂安。思公子五：長蘭，徙石城秋溪；次惠，移石城上弼；次芷，徙安遠上閣；長寧桂嶺；次蓀，移廣昌驛前；幼子萃，居州之官竹園。求公子三：長播，次揚，次柳，分徙信豐、瑞金。彥公仕隋，任揚州刺史，其子棟，遂家揚州，又分徙吉安之百家。七公裔，雖散處四方，要皆宗寧都之碩公爲始祖云。道光十二年壬辰歲孟冬月吉日裔孫煌謹述。（先世源流）。

標公是得公長子，一官是標公子，嵩郎是一官之子，晃郎是嵩郎子，昉公是晃郎公子，僎郎是昉公子，大郎是僎郎子，得一郎是大郎公子，小標是得一公子，四郎是小標子，五郎是四郎公子。十郎、號土德，葬武平象洞，是五郎公五子，生子二：承宗、承主。承主任梅州副使，其後遂家於梅，生子九：念一郎、念二郎、念三郎、念四郎、念五郎、念六郎、念七郎、念八郎、念九郎。念二郎是承主次子，號彌陀。念四郎是承主四子，與土德合葬象洞。千十郎是念四郎子，葬武平龍帳岌。正八郎是千十郎子，葬武平象洞，生子三：友忠、友明、友信。友信葬武平象洞，生子二：貴祖、貴賢。……（先世源流附鈔）。

我貴賢祖自陂角（按屬蕉嶺）肇基以來，子孫蕃衍，支分派別，遷徙於江廣福三省者居多。其餘各省，難以枚舉，即金山、錫山、吧城、烏魯木齊等國，亦分徙焉。而臺灣南北二路爲更多。若不重修宗譜，不惟不識其昭穆，將必視同姓如異姓，視家人如路人矣，烏在其爲尊祖者。乙亥（按爲光緒元年）之秋，於臺地接閱家鄉米田、捷如、遷瀛、蔭瑟、鏡初等所致之書，二云修譜之役，余即舞掌稱善，於是席請臺地父老，前來酌議捐題，共襄此舉。幸各發其尊祖之心，踴躍樂輸，開明陰陽丁稿，交余携回刊刷。余於丙子春到家後，得見徙外處者，紛至沓來，爭先恐後。合一族之衆，修成譜牒，披閱之下，昭穆朗然。……十七世裔孫庠生上瀛敬撰。（重修宗譜序）。

乙亥（按爲光緒元年）五月，同邑（按指鎮平，即今蕉嶺），賴瑤圃孝廉，捷如上舍兩君，以其

與西江宗人有修譜之役，屬序其緣起。……余惟賴氏，遠脉發源於春秋之賴國、近脉則分派於江西之寧都。代有聞人，舊序已臚舉之，不復贅。……天下之族，莫不有譜，其無者世變爲之耳。蓋兵燹之際，流離轉徙，因而遺失，前者遂無考稽；事定之後，救敝扶傷，不遑及此，瞬經數代，後者遂不復省記。東粵西江，賴氏所繁衍之地，皆經大亂。而賴之族，舊譜既存，乃亟重加釐訂，其於尊祖敬宗收族之道，豈猶有遺憾歟？……（賜進士出身誥授朝議大夫刑部郎中加一級鎮平鍾孟鴻撰序文）。